

東
華
續
錄

東華續錄

同治八十

臣王先謙敬編

臣張式恭恭校

冬十月己亥朔予甘肅陣亡提督鍾建高祭葬世職並殉難教諭
王汝揆建祠○庚子左宗棠奏竊臣於八月二十九日馳報北路
官軍於花馬池進剿連獲大勝時據劉松山八月初八日一稟聲
敘厥後雖疊據固原鎮原各屬降回及劉松山畱駐花馬池之提
督黃萬友等探報劉松山疊獲奇捷陝甘逆回震懼情形然未據
劉松山續報未敢入告也頃劉松山續報八月初六夜下橋營次
訥靈州城甘回頭目王洪馬愛被馬化澂噉令襲踞郭家橋陝回
遺巢妄冀斷我後路劉松山令諸軍派隊潛起擊之賊見官軍至
伏巢開槍劉松山知其怯也飭步軍蛇行從礮子密處猛攻馬軍

整隊伺巢破衝殺比官軍近薄賊巢巢中賊譟噪益甚官軍一鼓齊登賊巢火起馬隊兩旁鈔出立將竄出各匪圍殺斃賊四百有奇生擒五十二名其焚斃巢內者約二三百名正跟追閒忽下橋老營飛報吳忠堡角聲齊作賊將出隊劉松山令馬隊掣轉自率步隊繼之甫抵下橋見營前二里許步賊如林馬賊排列兩頭氣殊驕甚劉松山令各營小憩傳餐午刻中軍鼓聲起道員劉錦棠偕提督尹興茂張拔萃喻執益等各率所部由左路進提督蕭章開偕曾德喜李雲貴等由右路進劉松山率提督陶定昇易致中易德麟李就山李樹棠由中路進畱提督何作霖譚拔萃周國勝軍功董福祥各率所部居後以備策應馬隊營提督余虎恩潘運璋陳宗蕃列左路之左提督彭緒斡譚上連列左路之右均如牆而進賊亦分數路迎戰而騎賊猛從兩旁衝出勢如潮湧劉松山

令董福祥率兩營附左路馬隊衝殺周國勝率一旗附右路馬隊衝殺正酣戰間步賊之悍者冒死衝突騎賊半下馬挺矛對刺官軍愈戰愈奮賊不能支左路賊勢先卻劉松山飭何作霖率所部陷陣各路號鼓齊催賊遂大潰追殺四里許忽吳忠堡北有賊馬千餘突出似圖截官軍之後劉松山令譚拔萃周國勝橫截而出擊之斃賊多名賊仍從吳忠堡北敗去譚拔萃等躡追至吳忠堡西二里許與正路各營復合隊追剿敗賊悉向金積堡遁去計是日兩戰共斃悍賊數百名生擒四十三名奪獲戰馬百數十匹旗幟槍械以千計官軍弁丁陣亡者十五名受傷者七十三名管帶馬隊營官提督余虎恩左膀賊矛戳透猶力戰如故訊據生擒逆回供稱是役各寨堡精壯之賊及陝西余彥龍等均來接仗仍爲官軍擊敗此八月初七日兩戰獲勝之情形也初八日賊瞰官軍

正修秦渠隄堰已刻仍出隊索戰馬步橫排十餘里劉松山調修隄各營歸隊擊之追過吳忠堡二里擒斬二百餘名奪獲戰馬七十餘匹賊亦不如先日之戀戰也初九夜金積堡逃出漢民供稱四百戶一帶地方陝回頭目馬正和等股已到金積堡議來撲營初十日黎明吳忠堡西各寨堡處處角聲競起金積堡一帶馬步大股亦蠶擁而至劉松山飭各軍靜以待之午初始分五路出擊令先堵步賊俟騎賊鈔出陣前則以步隊附馬隊猛擊視賊馬步混雜則各路急撲之少頃步賊直偪陣前搗戰經官軍槍礮擊退旋卻旋前刀矛相接騎賊從兩旁衝來官軍馬步橫出截之賊不能支紛紛敗退官軍五路縱擊乘勢壓追八里許始行收隊計斃賊六七百名生擒六十四名獲戰馬二百餘匹軍械無算馬隊營官提督譚上連左腿受槍傷子未出員弁勇丁之陣亡者二十三

名受傷哨長七員弁丁九十八名蓋亦血戰矣十一日官軍壓吳忠堡而陳賊不復出馬隊擒生賊訊之據稱昨日之戰賊中因帶傷陣亡者甚多怨陝回不力不肯發糧陝回見於金積堡街市掠食堡中亦不能禁也十二日吳忠各堡賊出隊依堡而陳金積堡賊亦絡繹出隊列吳忠堡以南劉松山見步賊多而騎賊少心異之登高瞭望乃知騎賊已盡由吳忠堡北繞至下橋西三里許隱藏樹林及破堡中似圖於官軍出隊後襲取營壘者劉松山飭各營分兩路專擊吳忠堡南之步賊自率五旗步隊四營馬隊分擊樹林破堡中之馬賊飭董福祥兩營列隊爲策應之兵鼓聲起各路奮威衝殺步賊先奔依吳忠堡者收入堡內由金積堡來者向金積堡去劉松山指攻之騎賊旋亦潰退惟左路騎賊數團立馬未動各營縱馬挺矛衝入賊中步隊繼之縱橫盪決斃賊甚多大

隊分途掩殺約七里許兩路始會合收隊賊均向金積堡一面敗逸計是役擒斬悍回四百餘名奪獲賊馬百餘匹官軍陣亡四名受傷十七名此八月初八日至十二日四獲勝仗之情形也劉松山以陝甘逆回雖屢經剿敗而人數日增官軍更番出隊不能不畱隊守護營壘遇有須分支之處隊伍仍形單薄遂飭各營暇時堅修寨堡頓放輜重以便多派隊伍迅赴戎機十三十四十五等日賊伏未動各營併力修築堡寨竣工十五夜詗知陝回馬正和等股屢經剿敗後未入甘回堡寨散處吳忠堡以西各村莊夜半月明如晝劉松山令各營傳餐四鼓緣北面稻田塍埂繞向西南前進萬眾靜悄無聲比偏賊巢賊始驚覺急傍村莊列隊易德麟蕭章開劉錦棠乘賊措手不及各督所部奮威衝殺賊見官軍四面圍逼益恟懼不知所爲官軍分途猛撲立破賊巢十餘處敗賊

向吳忠堡各寨以南易德麟等緊躡之追至各寨牆邊步賊赴濠
遁避馬賊擁擠不前維時甘回各堡均吹角出寨圖掣官軍之勢
劉松山令譚拔萃周國勝陶定昇易致中何作霖橫出擊之賊勢
不支仍敗回各堡官軍乘勝縱擊擒斬不少天明仍收隊回營是
戰斃賊約四五百名生擒一百二十四名奪戰馬二百數十匹槍
械千餘件官軍陣亡者五名受傷者二十一名十六十七兩日賊
不復出官軍仍加修堡寨十七夜擒獲賊探訊稱陝回馬生彥白
彥虎郭阿洪等又各率所部由黑城子半箇城到金積堡劉松山
登高望之見西南吳忠堡至金積堡一帶火光騰灼數十里知陝
回大至賊探所供不妄料賊陣必寬卽定計分布擊之黎明營之
西南正西賊騎林立吳忠各堡亦皆出隊辰刻賊分由吳忠堡南
北兩路撲近營壘結隊六七重橫列十餘里已正騎賊直逼營前

劉松山督陶定昇易致中何作霖出左路飭易德麟李就山李樹棠出右路譚拔萃爲策應之兵擊南面之賊飭劉錦棠同尹興茂張拔萃喻執益出左路蕭章開曾德喜王秀棣李雲貴出右路董福祥爲策應之兵擊北面之賊飭余虎恩陳宗蕃等率所部馬隊擊南面騎賊以周國勝步隊附之潘運璋彭緒圻等率所部馬隊擊北面騎賊以董福祥中營步隊附之賊見官軍大隊成列而出騎賊卽退居步賊兩旁相依而陳比官軍進至里許賊騎仍從兩面鈔來步賊向前突陣勢頗凶悍劉松山先擊南面之賊槍礮止刀矛接鑿戰時許賊漸不支易德麟乘勢大呼陷陣各營齊進銳不可當南面賊先潰北面之賊經蕭章開劉錦棠各督隊悉銳衝殺亦卽潰奔馬賊見步賊已散無心戀戰官軍乘勝追殺直至吳忠堡西兩面敗賊併聚一路地狹人多敗走難速官軍合隊薄之

賊中器械馬匹拋棄無算計是戰斃賊近千名生擒一百三十二名奪獲戰馬三百餘匹營官提督陶定昇右胯中槍子傷王秀棣右乳中槍子傷子均未出其餘弁丁受傷者六十八名陣亡者十七名十九日金積堡賊競出刈稻約數千人劉松山按隊不動意俟其放膽來多則擊之是夜五鼓令馬步各營分伏南北路樹林中伺之天明賊果於吳忠堡北至余家湖一帶排列騎先步後連亘十餘里老者弱者牽馬騾絡繹下田割稻迨微見官軍隊伍步賊卽止不前騎賊仍分數路前來劉松山飛飭伏軍緩動待東北各營將賊擊動伏軍乃分路截之分布甫定賊已深入伏中官軍號鼓齊發騎賊驚惶勒馬不前各營乘勢縱擊賊大潰易德麟劉錦棠見東北賊陣稍卻急起截之殿後馬賊飛駛而遁步賊約五六百擠入稻水田中官軍圍殺殆盡大隊壓追五里許沿途斃賊

八九百名擒獲割稻老弱三百餘名縱之令歸是役馬隊營官提督余虎恩左肩復受槍子傷甚重弁丁陣亡者六名受傷者二十七名二十一日擒獲金積堡小回目馮沅發據供馬化澁因調崔三未到又調靈州王洪周斌兩股由黃河邊來嗾河東河西各寨精壯回民多帶擡槍小槍集金積堡並喊陝回馬正和將甯安四百戶一帶護守家眷各壯丁悉來決戰二十五日天明逆回自金積堡數路齊出步賊排列吳忠堡左右各村壕外騎賊附其兩旁吳忠堡各賊亦列隊壕外內以待劉松山按隊勿動至巳初飭易德麟李如山李樹棠尹興茂張拔萃分兩路由吳忠堡左進劉松山率席大成易致中何作霖蕭章開曾德喜分兩路由吳忠堡右進畱譚拔萃周國勝及董福祥中左兩營以備策應飭馬隊營官潘運璋等爲左翼喻執益率所部步隊附之陳宗蕃彭緒斡等爲

右翼李雲貴率所部步隊附之分布甫定騎賊漸次向前衝突各路官軍號鼓並發火器齊施騎賊不支仍敗退步賊之旁官軍奮威衝殺槍礮止刀矛接酣戰兩時斃賊無算中有紅衣青馬逆首中礮落馬賊搶負而逃餘賊大亂官軍乘勢蹙之賊中人馬擁擠紛紛墮入壕坎官軍四面圍偏見賊卽砍復猛追八里許沿途屍骸枕藉吳忠堡之賊縮退堡中漏逸之賊均向金積堡逃竄計共斃馬步悍賊千數百名生擒百五十餘名奪獲戰馬四百餘匹槍械九百餘件據生賊供稱逆首馬正和右乳帶礮子傷墜馬餘賊搶護而逃面色已變卽所見紅衣騎青馬者也馬正和在陝回頭目中凶悍最著此賊伏誅陝甘各回自更喪膽是役提督曾德喜左腿被擡槍子洞穿易執中左乳旁受矛傷甚重哨官受傷者十三員弁丁受刀矛礮子傷者七十一名受磚石傷者一百零四名

陣亡者三十七名二十六日金積堡回又出割稻劉松山見其人
數不多未出隊二十七日馬隊擒獲賊探訊知陝回崔三李經舉
等股悉到金積堡二十八日黎明西面一帶塵氛大起吳忠各堡
亦出隊南至水邊北至余家湖排列十餘里遙見羣賊多帶鋤鏟
並用矛量地劉松山揣賊屢經痛剿或圖決濠以阻官軍親往覘
之令各營準備出隊比回營卽飭易德麟督李就山李樹棠等進
左路蕭章開督前旗左旗及李雲貴等進右路自率席大成何作
霖譚拔萃周國勝進中路飭劉錦棠居後策應三路而以馬隊列
步隊兩旁別以步隊附馬隊之後比進至三里許騎賊已從左右
飛奔而來步賊亦冒死來撲官軍馬步整隊禦之刀矛槍礮並進
賊屢前屢卻轟斃殺斃無算步賊甫頓而騎賊仍與我馬隊拚死
相持劉錦棠催譚拔萃飛赴左路喻執益飛赴右路助戰騎賊始

敗各路乘勢猛撲緊壓緊追賊紛向吳忠堡左右兩路敗走追過
吳忠堡西賊復回拒又經官軍擊敗並向金積堡竄逸追殺五里
許至板橋敗賊人馬擁擠墜落溝塹者不計其數官軍收隊少頃
金積堡復出賊一二千似圖接應敗賊者劉松山飭兩路均連環
收隊追賊撲近始猛衝之收隊至吳忠堡東半里許敗賊麕聚愈
來愈多中營鼓聲起各路返旆猛撲賊復大潰仍追至板橋而還
共斃悍賊一千六七百名生擒一百八十餘名賊中受傷者約倍
於斬馘之數奪獲戰馬五百餘匹槍械則拾不勝拾矣是役提督
易德麟左乳受擡槍子重傷軍功董福祥頭顱及左肩均受瓢石
傷軍功張俊右肱肱受槍子傷馬隊營官陳宗蕃右腿受矛傷哨
官受傷者十八員其餘弁丁受刀矛槍礮者九十二名受磚石傷
者一百三十七名陣亡員弁勇丁三十五名而殺賊多於諸戰此

劉松山一軍八月十六日起二十八日止疊次獲勝之情形也臣
維馬化澂所恃以抗官軍者有二金積堡地勢居秦漢二渠之間
黃流分醴舊稱沃壤足以阻水自固而困官軍一也回教有新老
之分馬化澂本新教回民與陝回老教回民宗旨不同互相水火
及與漢民尋仇生衅則彼此通同一氣無復新老之分而甘回究
不如陝回之強馬化澂尤思藉以自衛始因陝回竄附代爲乞撫
市德於陝回繼因陝回反覆無常又思豫爲別白以免官軍之勦
其詭謀蓋謂陝回勝固可藉以爲重陝回敗亦有詞以自解究之
陽順陰逆其用心則路人所共知二也劉松山自花馬池進靈州
於甘回之已撫者本已豫示區別馬化澂喉甘回陝回抗拒時初
不料官軍之鋒不可妄犯思一逞以自雄迨八月初三日郭家橋
大敗後初四日又遞稟代陝回求撫爲緩兵之謀而於劉松山兵

至下橋距金積堡三十里地方卻一字不露蓋欲掣臣與穆圖善
准撫之批以挾制劉松山耳臣於馬化澂前稟批示勦撫機宜北
路應由劉松山劉錦棠察看南路應由雷正綰黃鼎察看者以此
幸劉松山燭其奸謀一意進剿未及一月疊將甘回陝回痛加懲
創實殺賊一萬數千之多臣飭雷正綰黃鼎周蘭亭簡敬臨馬德
順馬步各軍亦於陝回犯及固原時迅與埽蕩連獲大捷奸謀更
阻馬化澂旋又於九月初三日具稟求撫矣臣閱其九月初三日
一稟情詞尙爲哀切而絨中又附八月初六日一稟則頗以劉松
山濫殺激變爲言猶思藉詞聳聽情形殊爲可惡臣又批飭之仍
擬察其誠僞以定勦撫貳則討之服則舍之務在攻心以規久遠
所有馬化澂四次原稟及臣批詞均鈔送軍機處以備考覈至金
積堡地勢之險要陝甘官民均能言之劉松山所藉以得手者在

於靈州速進先據下橋後五里之永甯洞得以宣洩河渠之水故能制賊而不爲賊所困觀馬化澂見稟求劉松山退駐靈州及請臣委員赴靈州受撫其情可見至固原北路各軍捷狀及甘回求撫陝回南竄甯夏已無回蹤一切情形容卽據實續報此次陝甘回逆同時抗拒官軍賴劉松山速赴戎機分別辦理得以潛消積年隱患於大局實有關繫該提督忠勇實一時諸將之冠前因失察游匪一案蒙恩革職畱任可否請旨開復處分之處出自天恩其前案內失察之分統營哨各官此次均奮不顧身亡傷頗眾可否一並免其查參其案外各員實爲出力可否由臣保獎出自聖裁至疊次陣亡之記名提督鍾建高提督銜記名總兵胡玉元記名總兵牛得超推補副將陳士標鍾宣晉龍錫琯楊朝有副將銜補用參將萬名高易本集補用參將張澤友易光前參將銜

補用遊擊李名成楊篤才補用遊擊劉疏元黃德祥賓義和補用
都司徐育南章如山金崇德鍾貴德拔補守備趙祥友王玉順常
中華陳國恆涂碧勝守備銜千總吳名填蕭其中拔補千總劉桂
堂拔補把總單洪桂熊玉貴滕加全鄧代全楊芝蓮等實係血戰
捐軀應均請旨飭部各照官階從優議給卹典以慰忠魂而昭激
勸穆圖善奏前因董志原大股陝回竄入甯靈地方奴才所部兵
力驟難抽分權派署河州鎮總兵胡昌會前往督同靈州金積堡
回紳馬朝清彈壓開導及據胡昌會稟報駐紮甯安堡貴字三營
被圍多日奴才飛飭該統領夏允升相機移營駐紮中衛爲保守
縣城之計各情業經先後奏明在案嗣據胡昌會連次稟呈由中
衛啟程前赴靈州金積堡途次甯安堡適陝西回目楊文治崔魏
馬鎮和等派隊迎接面懇代稟投誠內有河州回目馬占魁對眾

喧嚷云穆將軍收撫是假往往先撫後勦未可深信竟當糾約陝眾赴河州會合大舉入寇胡昌會當與面爭陳以成敗利害多方曉諭更幸陝目楊文治亦爲幫同開導馬占魁始云既係如此俟果將陝眾收撫安插妥當彼時伊等誓願歸誠等語胡昌會隨卽馳赴金積堡查得本地回民安靜如常當與馬朝清飛調陝西各回目馬鎮和崔巍陳林馬壽清閻明泰藍泰治士俊李經舉馬長順禹得彥于恆廉沙學德馬必政白彥虎楊文治馬生彥等先後到齊該頭目均願投誠求爲轉懇收撫該署鎮因無地安插暫令各在見住地方靜候請示再行遷移不准在外滋擾自外生成該署鎮卽於七月二十五日由金積堡啟程馳赴甯安堡時我軍貴字三營被困日久糧水兩缺胡昌會卽諭令馬鎮和等遣散其黨幫辦車輛船隻將三營弁勇渡河於八月初三四五等日一併移

紫中衛防守該縣城池忽接馬朝清函開劉提督松山帶領大兵
突抵吳忠堡率行搶殺馬朝清差人投稟劉提督語言矜躁有不
分良莠之意難免已降回民猜疑聚眾滋事邀請胡昌會仍回金
積堡商辦等語胡昌會正擬前往又聞陝甘回眾麕集金積堡有
與大兵接仗之事尙不知大局如何等情呈請覈辦前來 奴才查
左宗棠派劉松山一軍由北進逼原係迎擊董志原竄賊免致勾
結甘回蔓延爲害該署鎮胡昌會所稱各該頭目俱願投誠固難
保非勢窮乞降藉緩我師而謂陝甘回眾麕聚金積堡與官兵接
仗亦係該署鎮得諸傳聞虛實均未可遽信但查吳忠堡距金積
堡止三十里距靈州亦三十里若如馬朝清所致胡昌會信函兵
抵吳忠堡率行搶殺實恐激成事端又成不可收拾之勢伏查靈
州回紳馬朝清卽馬化澂本係營弁自甯夏郡城失陷被逆回馬

兆沅偪脅靈州變亂其時該紳尙知約束金積堡回民不許出外
滋事先向雷正綰曹克忠兩營求撫交銀交糧後曹克忠帶兵進
紮滾泉該紳恐回眾疑懼上稟諫阻未蒙批准曹克忠等旋又進
紮強家沙窩致陝回拚死抗拒大挫兵威而馬朝清仍勸諭本堡
回民安靜待撫並設計將馬兆沅殺斃迨奴才奉旨督辦軍務該
紳復具稟輸誠初次捐修渠工銀八千兩米一十五萬斤並呈繳
器械馬匹多件曾經奴才於同治五年三月具奏並鈔錄該紳原
稟恭呈 御覽欽奉寄諭奴才善奏復陳馬化澂投誠各摺著准
其投誠責令前赴各路開導回民立功自贖等因即經奴才宣傳
聖諭先令該紳隨同代理靈州知州尹泗將該州善後一切事
宜妥速籌辦並查點營庫存儲各項軍械數目亦於是年四月間
復奏嗣該紳安輯地方保衛漢民勸導回眾投誠擒斬叛亂陝匪

並親往李盱海城等堡收撫鹽固一帶降回出力

奴才

於是年九

月初八日保奏奉旨馬朝清著賞加副將銜仍責令該弁保衛漢

民勸導回眾不准始勤終怠欽此等因迨

奴才

親赴靈州該紳馬

朝清所部回眾俯伏道左感頌 皇仁馬朝清並倡率報捐翎頂

職銜約二萬兩復自願捐助糧米豫備駝隻陸續轉運大營

奴才

查看漢回安堵商販通行流亡復業地方一律底定情形又於是

年九月二十八日詳細陳明繼奉同治七年正月初七日 上諭

玉通奏西甯府屬漢回互鬪北川失陷一摺其新降回目馬朝清

並著穆圖善催令前往毋稍遲緩等因

奴才

因甯靈一帶安插就

撫之回悉資彈壓其責甚重難以分身已將未能赴湟緣由覆陳

各在案至同治七年閏四月該紳會同靈州兵役將著名刁匪白

哇馬晶中馬舉擒獲解送甯夏郡城分別斬首梟示曾蒙恩賞加

提督銜其同時獲犯出力之馬耀邦馬萬選赫壯圖馬明起赫忠
義均蒙分別賞給官階虛銜是年六月該紳馬朝清派令穆生花
馬振海馬忠海又將暗中結盟謀爲不軌之楊生魁馮學禮白天
鳳等一百餘人殲斃解散餘黨救出被脅良民奴才於上年
八月據實奏明亦在案且連年捐糧運送每歲不下七千石積成
巨款接濟飢軍是馬朝清之深明大義矢志靡他證之前事已班
班可考今官兵行抵吳忠堡如果率行搶殺則金積堡與靈州均
唇亡齒寒自不免羣生惶惑夫螻蟻尙知貪生人豈不知惜命當
危急之時鋌而走險勢所必致奴才不敢謂甯堡已降之回皆良
民也但無事之日善者相安惡者自隱受其制卽向有匪徒竊發
善者不難羣起攻之如馬白哇楊天魁等股卒爲馬朝清穆生花
等殲除是也若兵自外來事起倉卒居民不知其意之所在善者

固不免驚疑惡者亦必圖一逞以自快且恐不法之徒妄造謠言
謂官兵此來洗某莊某堡是善者爲惡者煽惑亦將偪而爲抗拒
官兵之舉彼時各頭目如馬朝清等雖可信其立志堅定而教下
多人情急變生必致理喻勢禁兩爲束手我軍能以大獲全勝一
股殲除幸也而已上千天地之和若官軍稍有不利從此回氛四
起東路未定之鹽固西路已撫之肅州皆成變局而河狄西甯各
路匪徒更將乘機蠢動烽煙滿地我軍應接不暇究從何處下手
此實萬不可不審慎於先機者也伏讀屢次 上諭祇分良莠不
分漢回甘省漢民受回匪之害最深固無不思拔盡根株方足以
消積忿卽 奴才亦豈不願將此股全數殄滅弭隱患於將來但從
古用兵無非勦撫兼施未聞不畱遺種卽近時髮捻各逆一經痛
勦之後其畏罪歸誠者無不仰邀 聖澤化盜爲民良以殲厥渠

魁脅從罔治且萬無誅鋤淨盡之理竊思

奴才

從前帶兵入甘親

見甯靈百姓流離失所無業可歸竟致人食人肉而官軍又嗷嗷待哺郡城久攻不下若不將計收復既虞士卒因飢譁潰更恐熾回匪之凶餓漢民益靡有孑遺是以當該處回族震懾兵威俯首聽命之時卽爲因勢利導分別勸懲勒令縛獻首惡呈繳器械馬匹准予自新在受害之漢民固不免疑

奴才

偏於主撫而不知寬

降回一綫之路正爲全漢民數百萬之生迨後五年三月蘭州省城兵變河狄陝西回匪乘間環逼於外其時省城糧價每斗值銀三十餘兩餓殍盈途根本之危懸於一綫而甯靈降回各安生業並無一人前往蘭州助逆於是漢民相信日深陸續歸籍者難以數計今已數年漢回交相貿易和好如初若降回稍有反側之心漢民卽先有恐惶之象豈能毫無猜嫌至於今日伏思

奴才

滿洲

世僕何德於同何仇於漢況所部兵勇及辦事之人均屬漢民有何區別實因大局攸關天良難昧故有真心向化之回必仰體朝廷一視同仁之意代爲乞恩卽明知其投誠不足恃而亦權准收撫者亦無非痛漢民火熱水深因兵難徧及不得不暫示羈縻以救殘黎性命此等情形俱已早蒙 聖明諒鑒如今日之甯靈若

不分別良莠恩威並用實恐甘省兵連禍結迄無已時卽將來左宗棠剿而後撫亦未必能堅回民之信

奴才

雖將交卸不敢知而

不言亦未敢聞而不願除飛飭胡昌會督同馬朝清仍行妥爲開導彈壓本地回眾毋得妄起猜疑並確探北路進兵實在情形另行奏報 上諭軍機大臣等前因定安奏劉松山肆行殺戮致回民復叛襲踞靈城各情疊諭該大臣查明具奏見在靈州情形究竟何似劉松山有無濫殺激變情事仍著懷遵前旨迅速奏聞馬

化澹求撫各節原未可盡信爲眞若此時靈州已失該回目有公然復叛之心該大臣自應督軍進剿破其奸謀若已震懾兵威眞心求撫前此亦無襲踞靈州之事卽著斟酌情形妥爲辦理毋令日起猜疑至甘回窮困情狀尙與陝回不同該大臣亦當悉心體察以戢兵端雖不可一意言撫而臨事決機亦不可涉以成見所請開復劉松山革職畱任處分及營哨各官免其查參出力員弁請獎之處均著俟查明靈州情形覆奏後再降諭旨其固原北路各軍戰狀及甘回求撫陝回南竄情形著卽詳晰查奏以紓廑繫本日據穆圖善奏范銘石成器兩軍索餉甚急請飭催撥餉接濟等語著該大臣迅飭袁保恆於西征半餉內趕緊勻撥源源解赴甘營不可稍存膜視穆圖善又奏稱甯靈回眾仍宜籌撫及飭胡昌會督同馬朝清開導回民各節與見在辦法有無窒礙亦著該

大臣隨時籌辦用靖邊陲原片著鈔給閱看將此由六百里諭令知之○諭穆圖善奏肅州善後事宜請仍歸楊占鰲經理一摺據稱提督成祿前經奏請令署甘肅提督楊占鰲赴陝西等處募勇西上助剿見在關外軍情該署督勢難兼顧楊占鰲有布置肅州善後之責未便遽離甘省等語成祿所奏在川陝等處募勇前經降旨已不准行著照穆圖善所請仍令楊占鰲署理甘肅提督責成該員將肅州善後事宜妥爲經理毋任回民復生事端前諭成祿將見有兵勇汰弱畱強覈定實數奏聞聽候諭旨該提督自當懷遵辦理其高臺以東糧石穆圖善奏稱難以分撥成祿軍營仍將安西等三州縣徵糧專撥之處並著穆圖善隨時斟酌情形辦理將此由五百里諭令知之○諭錫綸等奏統籌機宜敬陳管見一摺據稱厄魯特人眾前籌分安杜爾伯特及喀爾喀四盟惟變

民新降人心未固徙畱兩難該處點禁之徒頗爲不少往往肆行煽惑必須將其莠種移之遠方而後蚩蚩愚氓不難安插等語索倫等人眾疊經諭令福濟等妥籌安插仍著該將軍等懍遵前旨酌量情形分別安插毋使滋生事端至錫綸會同棍噶扎勒參所籌裹糧西征一節該呼圖克圖勇於任事具見惻忱惟布城變民甫定應行籌辦之事甚多能否遽圖大舉錫綸何以不與福濟等先行妥商率行具奏殊屬非是著福濟文碩錫綸仍會籌全局一切機宜務期次第辦理毋得稍涉孟浪將此由五百里各諭令知之○辛丑諭軍機大臣等金順奏官軍續獲勝仗會師南進圍攻賊巢一摺逆目納萬沅在納家牐等處增黨修卡併力抗拒經金順商同張曜親率馬步各隊分道進剿大獲勝捷見在會師南進徑擣納家牐賊巢酌畱隊伍防護甯夏郡城辦理尙爲得手著金

順卽同張曜督率各軍相機進剿。該逆各巢一律攻拔毋任負隅定安務當多撥勁旅爲張曜後路接應以厚兵力昨據左宗棠奏劉松山一軍在吳忠堡等處獲勝見有提督黃萬友赴該營隨剿著金順飭令迅速進兵彼此聯絡聲勢以便節節兜剿迅掃逆氛將此由五百里各諭令知之○壬寅諭軍機大臣等前因花定等處喫緊諭令左宗棠迅飭郭寶昌一軍移紮榆林迤西以厚兵力旋據左宗棠奏郭寶昌患病未痊已催金運昌撥卓勝軍馬隊由綏德鎮靖堡定邊前進見在甘肅一路回匪雖經劉松山等進剿獲勝難保該逆不乘閒東竄轉瞬河冰凍結晉省防務極關緊要郭寶昌向來帶兵甚爲奮勇此時病體當已就痊著左宗棠卽飭該提督酌帶親兵前赴山西聽候李宗義調遣並著李宗義督飭該提督會同李慶鄭將河防事宜嚴密布置以資得力其餘各

隊仍著左宗棠嚴飭金運昌力扼花定一帶疏通糧路兼杜賊蹤旁竄該軍餉需英翰仍當源源籌解毋稍欠缺將此由四百里各諭令知之○乙巳左宗棠奏竊臣於八月二十九日馳報剿辦中路土匪迅就肅清見籌會剿北路回逆情形後謀報固原回民母仲元等被陝回白彥虎等所脅挈眷北徙金積堡陝回白彥虎及甘回李正榮等各股復由豫望城黑城子竄入固原州揣賊意在阻截官軍北行而以全力抗劉松山也維時固原提督雷正綰駐軍古城川石家溝八月二十四日陝回白彥虎甘回李正榮穴撲官軍營壘適提督周蘭亭自瓦亭馳至會同雷正綰擊敗之賊復噉豫望城半箇城李旺堡各處之賊紛來抗拒臣已調總兵簡敬臨陝安道黃鼎自中路馳至二十八日簡敬臨周蘭亭黃鼎出隊辰刻抵二十里鋪偵賊由平川兩路衝來官軍分三路迎擊賊眾

盡擁而至氣殊驕甚官軍嚴陣卻之槍礮對施斃悍賊數十名鏖戰逾時雷正綰隊伍由黃毛嶺壓下簡敬臨周蘭亭黃鼎麾軍猛進奮威衝殺賊不能支各營馬步乘勢壓鞏斃賊二三百名城賊復護老弱衝出官軍分途橫截將賊衝爲數段各城及固原敗賊均向黑城子敗遁各軍躡蹤緊追至固原北三十里頭營地方沿途斬殺無算計共斃賊一千有奇生擒千餘名分別斬釋奪獲騾馬千餘匹刀矛槍礮數百件此二十八日官軍會剿逆回獲勝肅清固原之情形也訊據賊供劉松山自八月初三日郭家橋大捷後旬日內又疊獲大捷馬化澂喊甯安四百戶同心豫望各堡回眾再與劉松山決戰因恐固原各軍並進遣馬萬春等喊陝甘回眾力抗南路之師臣當飛催固原各軍乘勝速進期與劉松山收夾擊之效雷正綰簡敬臨周蘭亭等訶黑城子踞逆因官軍進

固原白彥虎李正榮敗後一日數驚各同眾紛紛北徙九月初三日四鼓各軍秣馬蓐食整隊前進行距黑城子四里許瞭見賊眾蟻聚平川騎賊布滿東西兩岸官軍步隊從中路排進馬隊張左右兩翼徐行賊見官軍至正分股上川抵禦馬隊疾馳繞出黑城子之後賊眾大亂步隊乘勢薄之賊不及歸巢冒死北竄步軍立破黑城子回堡擒斬多名馬隊躡至界牌沿途殺斃數百名奪獲騾馬百餘匹仍收隊回固原適三百戶地方良回穆進善報稱白彥虎等被創後糾合禹得彥楊文由黑城子旁出胡家廖坡大股屯踞距固原六十里之三營地鼎出隊自率所部於初八日進剿中步隊遂密結方陣整隊徐行騎擒斬連日賊且堵且退似引官軍入者初十日黎明周蘭亭簡

敬臨畱兩成隊護輜重於楊老莊各率八成隊進勦行未數里該
逆大股風馳雨驟而來簡敬臨飭總兵姚連陞譚正明彭壽山率
隊進左路周蘭亭飭總兵趙玉亭劉明泰知州黃立鼇率隊進右
路親率所部及廣東高州鎮總兵徐文秀縣丞吳恩榮居中參將
桂錫楨領馬隊出左路之左參將李廣珠領馬隊出右路之右分
布甫定該逆以大股猛撲中路另股從左右兩路鈔來兇悍異常
各營屹立不動俟其漸偏漸進乃以綫槍洋槍連環轟擊夾以劈
山礮賊中人馬應聲而倒勢漸不支周蘭亭簡敬臨麾左右兩路
馬隊飛馳陷陣步隊繼之賊眾潰走官軍躡至三營地方敗寇入
堡死拒左右破堡內伏賊齊起周蘭亭簡敬臨飭姚連陞趙玉亭
等兩路出隊擊之馬隊斜鈔賊前各營愈戰愈奮銳不可當該逆
越堡而遁堡外之賊亦奪路狂奔是處坂峻溝深賊中人馬自相

蹂躪墜斃無數官軍分投扼截斃賊八百有奇生擒百餘名奪獲戰馬百餘匹敗賊向洪溝逸去當據賊供甘回馬萬春喊白彥虎禹得彥楊文治圖與官軍力戰今日擊敗之賊卽馬萬春所統也訊畢斬之令彭壽山黃立鼐率所部憑堡扼駐以防黑城子何家溝鈔襲之賊周蘭亭簡敬臨仍率各營前進甫行數里後路探騎飛報何家溝突出一支騎賊圍撲彭壽山等營周蘭亭簡敬臨亟麾軍回援時該逆正與彭壽山等相持適雷正綰亦率所部各營馳至賊駭而奔各軍仍會合追剿將抵黑城子瞥見紅衣賊首率騎賊飛奔前來勒敗賊力圍官軍整隊迎之馬隊亦下馬挺矛接戰立斃悍賊數十名賊勢稍卻忽紅衣賊首領數百騎飛馬突陣勢甚兇悍官軍分隊截之立將賊首戳傷墜馬餘賊亡命搶護復經官軍殺斃多名賊仍敗退訊據賊首乃陝回僞元帥楊文治狡

悍異常屢以撫誤官軍者也立斬其首以徇又追數里始收隊回營計是役共斃悍賊千餘名奪獲騎馬近千生擒百數十名此初十日各軍獲勝擒斬逆首情形也逆首楊文治首級解營臣令傳示受害各地方以昭天討而快人心驗視楊文治所用鐵矛重十七斤其悍可想十一日雷正綰馬德順周蘭亭簡敬臨黃鼎各畱一營駐黑城子防海城鹽茶廳豫望城來犯之賊率所部馬步各隊進攻李旺堡十二日五鼓各軍齊由八營地方進發行近李旺堡調賊正挈眷而逃馬步各賊列堡外思抗官軍雷正綰等商令分兵三路齊進馬先步後賊望風而潰陣斬數十名乘勢衝殺立將李旺堡賊巢攻毀賊向半箇城竄走官軍馬隊猛蹙之步隊兩路夾擊賊遇溝坎頓旗死抗官軍追之急逆騎輒擁擠不前自相蹂躪死者無數猛追三十餘里至永家莊沿途斃賊近千名得

逸去者僅數騎耳訊之生擒賊供知李旺堡賊首李應春綽號野賊老巢尚在李旺堡前五里地名穆家潭各軍立派步隊圍之是處堡小而固賊見官軍至憑堡穩抗官軍以炸彈劈山礮仰攻之肉薄而登立將賊巢攻破巢內悍賊數百名無一漏網生擒偽副元帥楊輝雲訊知賊首李應春赴豫望城求援未回楊輝雲本陝回僞元帥李經舉之副也當斬以徇其漢民婦女幼孩則縱之是役斃賊千餘名獲騾馬千餘頭生擒百數十名此雷正綰周蘭亭簡敬臨各軍攻克李旺堡穆家潭情形也自楊文治伏誅後陝甘各回震懼益甚而金積堡馬化澂已屢爲劉松山勦敗詭謀盡露且愧且悚不得不令各堡甘回迅速求撫以掩其勾結之奸馬化澂新教各回堡以豫望城卽禹王城半箇城卽同心堡爲最大諸回目旣受馬化澂指使就官軍求撫陝回心更不安於是陝回禹

得彥白彥虎李經舉等之在豫望城者潛率各部眾由鹽茶廳西竄約踞甯安四百戶之崔三馬生彥及馬鎮和部眾金積堡所畱之陝回陳林等悉數西趨圖由長流水打拉城出會甯安定一帶南合河州之回暫延喘息黃鼎得各土回密報卽商馬德順收隊黑城子會師追之十四日兩軍由黑城子冒雪遶行六十里抵黃楊坪詢之土回知禹得彥等三日前盤踞鹽茶廳一帶追官軍攻克李旺堡始移家小輜重於西安堡李經舉白彥虎仍在黃家園黃鼎馬德順會商十六日馬隊先行步隊繼之爲犂巢埽穴之舉追六十里至鹽茶廳見炊燼尙然知賊去未遠馬德順督馬隊又猛追四十里至西安堡一望平川延袤三數十里四面賊帳滿布見官軍馬隊馳至老弱婦女號哭紛竄悍賊數千吹角齊出力拒官軍馬德順令馬軍分半下馬挺矛衝殺一半縱馬開槍縱橫盪

決立斃悍賊五六百名賊勢大股分向黃家園及西山一帶奔竄馬德順及黃鼎呼敦馬隊營官胡應芳黃虎臣整隊追殺見賊卽欣沿途又斃賊千數百名賊中頭目死亡者多不復成列馬德順見前面山岔紛歧急督各營分三路按剿分統提督張會元向南山一路副將崇志率吉林馬隊胡應芳黃虎臣率呼敦馬隊向北山一路自率黃旗及親兵小隊由中路黃家園進復追殺十五六里至劉家井路隘不容方駕兩旁皆深溝馬德順率親兵十餘策馬前行察看地勢忽兩旁馬步伏賊數百齊出刀子攢刺山上賊眾拋石雨下馬德順身帶刀子傷七處猶與黃旗哨官副將張顯揚各手刃數賊力竭而殞張會元受矛傷三處吉林馬隊哨官全德受矛傷五處呼敦馬隊哨官劉治均受刀子傷七處經各營搶獲上馬折回計各營馬隊弁丁力戰陣亡者共三十餘名黃鼎隨

率步隊馳至督隊勒馬回擊飛催步隊分路向前衝殺始將逆賊擊退因路狹不能施展收隊還駐黃家園是夜黃鼎與張會元等面商飭黃旗小隊及副白旗護送馬德順張顯揚忠骸回固原州而仍率所部馬步各營會同張會元所部副回旗馬隊崇志所部吉林馬隊於十七日由西安堡出乾鹽池向打拉城前進行六十里至乾鹽池探報打拉城見有大股逆回盤踞炊煙繚亘數十里黃鼎詢之降回知是甯安四百戶等處陝西回逆由長流水西竄者是夜四鼓馬步各軍急起躡之行近打拉城二十里卽見東北山梁一帶煙塵滾滾西去知逆賊已由打拉城竄動黃鼎飭左營押護輜重緩行飭參將林定遠總兵黃有忠參將朱蘭亭率所部步隊副將胡應芳率左營馬隊循右路山梁進張會元崇志所部馬隊循左路平川斜襲打拉城之後副將黃虎臣率所部馬隊循

中路徑擣打拉城黃鼎自率副將李玉春副將何玉超等步隊繼之比抵打拉城見兩山開豁地勢寬平當飭馬步聯絡徐行賊見官軍馬步各隊誤爲鹽茶廳西安堡前來會合之賊適然不驚官軍亦不動聲色迨逼近賊前號鼓齊鳴聲震山谷賊出不意狂號亂竄黃鼎揮軍橫衝直突立將賊眾截爲三段一奔向打拉城一奔向東北山一向北面亂山狂竄李玉春何玉超各率親兵及洋槍隊分路截殺斃賊數百名墜崖跌斃者不可勝計於時呼敦右營馬隊逼近打拉城逆眾憑街口抗拒弁丁下馬開槍轟擊刀矛手猱騰而上立將堡城攻破逆眷騾駝糧料輜重塞滿街衢黃虎臣臣帶隊從人畜堆中衝出街口逆回馬步數千拚命返鬪黃虎臣督勇下馬步戰李玉春何玉超等所部步隊適至結成方營橫貫賊隊張曾元崇志所部馬隊適從左路平川鈔出賊後前後夾攻

斃賊無算騎賊先奔步賊則圍殺殆盡矣馬隊各營仍向西追殺其右路馬步各營進攻東北山梁之賊甫上第一重山梁賊之馬步已嘯聚一處由上壓下力扼官軍胡應芳督馬隊繞上山梁之左林定遠督步隊繞上山梁之右後兩營步隊又從中路整隊齊進立斃悍賊數十名賊眾紛潰各營三面併進搶上山梁齊壓而下追殺十餘里斃賊約四五百名收隊回打拉城行十餘里忽山口突有紅旗馬賊數百飛駛而來林定遠黃有忠朱蘭亭督隊截殺花翎守備賈洪順衝入賊中礮子穿胸陣亡胡應芳怒馬陷陣步隊繼之立斃悍賊百數十名奪獲戰馬百數十匹敗賊飛奔上山而逸比各營收隊回打拉城則夜半矣是役計斃賊二千七八百墮崖死者不計獲駱駝一千二百餘頭騾馬牛驢共二千餘頭獲賊糧器械無數生擒二百餘名擇其兇悍者百餘名軍前正法

餘仍釋之此九月十六十八兩日黃鼎馬德順馬步各營獲勝情形也臣維馬德順黃鼎馬步兩軍十六日擊敗之賊是由豫望等堡竄出之陝回白彥虎禹得彥李經舉等股十八日所擊之賊是由甯安堡四百戶等處竄出之馬生彥陳林顏河洪擺萬海冶阿洪及馬正和餘黨是陝回悉數西竄甯夏靈州已無陝回蹤迹矣賊之西竄意在會合河州逆回此次雷正綰周蘭亭簡敬臨黃鼎諸軍擊之固原黑城子李旺堡連獲大捷甘回不敢容留陝回以千勦辦豫望城半箇城韋州堡各甘回均已款營求撫臣已飭總理營務道員曾傳理察其誠偽分別辦理其陝回之竄至西安堡打拉城者又經馬德順一擊之西安堡以西黃鼎擊之打拉池以北計共殺悍賊數千賊之糧食輜重軍械牲畜寶已拋棄過半似甘肅北路肅清可期臣見檄雷正綰由半箇城進長流水新堡子

周蘭亭簡敬臨繼之期與黃鼎馬步諸軍收夾擊之效其先竄一股黃鼎所部陞用提督徐占彪步隊三營已於十七日由靜甯州赴會甯截剿臣所調提督楊世俊正四旗馬隊亦於二十二日馳抵靜甯二十三日馳往會甯合隊賊如由會甯出安定黃鼎一軍及張會元崇志馬隊當先顧蘭州省會然後追剿向河州之賊諸軍西趨其固原黑城子李旺堡一帶新復之區不可無軍填紮見檄總兵張福齊率所部五營分駐黑城子李旺堡提督周紹濂率所部四營分駐瓦亭固原州以重北路之防而通諸軍之氣臣拜摺後料理後路糧運事宜卽進軍平涼布置一切將來或由中路或由南路前進或緩或急惟當審度機宜慎以圖之上諭軍機大臣等此次陝回糾眾紛擾意圖阻截官軍白彥虎等雖負創西竄難保不勾煽河州各回復行東犯左宗棠見檄雷正綰等軍分

投防勦並擬進軍平涼著卽嚴飭雷正綰等各率所部相機夾擊將未獲之各回目檢斬淨盡以靖陝氛並著將後路糧運事宜趕緊布置於抵平涼後斟酌緩急整軍前進一面將蘭州省垣及河州狄道防勦各務悉心籌畫並飭張會元崇志等力顧蘭州不可稍涉疏虞馬化澂是否顯露叛逆抑係求撫緩師靈州一城如果失陷究爲何股所襲均著該大臣遵奉前旨將該城有無被陷及劉松山亂殺激變各情迅速查明具奏其豫望城半箇城各處甘回旣經款營求撫卽著飭令曾傳理安速辦理但不可爲其所紿致貽後患將此由六百里諭令知之○以甘肅北路會勦回匪獲勝賞提督雷正綰道員黃鼎珍物總兵官劉明泰三代正一品封典提督周蘭亭總兵官趙玉亭副將崇志巴圖魯名號總兵官簡敬臨等加銜升敘有差○予甘肅陣亡總兵官馬德順祭葬世職

建祠副將張顯揚等祭葬世職附祀○丁未諭內閣工部尚書毛昶熙都察院左都御史沈桂芬均著在總理各國事務衙門行走光祿寺卿總理各國事務衙門章京成林並著在該衙門大臣上行走○戊申諭軍機大臣等金順奏會師南進大獲勝仗並請飭郭寶昌黃鼎等軍前進各摺片逆匪納萬沅等糾合陝回各股在漢渠官橋迤南一帶迎拒官軍經金順張曜會派楊春祥等從東繞擊並督同各軍分路鈔襲賊眾大潰悉向納家牯等處敗逃我軍追過龍王廟南並將東西各壘攻拔據賊供賊首馬添濬納保均已殺斬其來援新賊亦經常福等擊敗金順張曜遂於漢渠東西分紮復破賊寨兩處官軍追近納家牯寨門楊春祥等又拔其南面兩壘殺賊殆盡此次金順等會師南進連獲勝仗偪紮老巢洵足以寒賊膽仍著該署將軍等乘此聲威督飭各軍將近橋納

洪賊寨攻拔痛掃逆氛其渠泮礮臺亦著趕緊築齊以資進取前有旨令郭寶昌前赴山西歸李宗義調遣左宗棠諒已遵旨辦理黃鼎與雷正綰等在打拉池一帶剿賊見在得手能否抽赴北路著左宗棠斟酌調撥至金運昌一軍打仗尙屬得力該大臣卽令該提督率隊前進會同劉松山一軍與金順張曜派出各軍相機夾擊以壯聲援疊據左宗棠奏稱甯靈一帶已無陝回蹤迹茲覽金順所陳大股陝回麇集甯靈東西兩岸唐漢兩渠並被挖斷各情與左宗棠奏報不符此時甯靈界內究竟有無陝回抑係甘回滋擾均著該大臣詳細查明據實具奏金順另片奏請飭通商衙門將僧格林沁所造開花礮兩尊配齊子藥派員解往等語京師向無通商衙門名目本日已諭知神機營查明撥給矣將此由六百里各諭令知之○辛亥諭軍機大臣等定安奏察哈爾官兵剿

捕土回各匪獲勝並請暫畱桂成辦防請將洋槍隊畱於歸綏及
杜嘎爾因病請假各摺片土回各匪竄擾阿薩爾西里地方經杜
嘎爾飭令達爾濟督兵往剿遇賊於罕泰河迤北官軍奮勇截剿
賊匪敗退追殺四十餘里斃賊三百餘名餘賊向西逃逸宋慶派
兵馳赴鹽海子一帶剿辦北路匪徒亦獲勝仗著定安咨會宋慶
杜嘎爾等各督所部迅將鄂爾多斯七旗境內敗竄餘匪剿除淨
盡庶可專意河防桂成久任歸綏沿河情形尙爲熟悉著准其暫
畱該處辦理冬防事宜俟明年春融冰泮再行來京赴任富勒琿
所帶洋槍隊一百五十四名著照所請畱於歸綏交富勒琿統帶
卽由定安知照金順並設法接濟糧餉毋令缺乏杜嘎爾督隊勇
往疊著戰功此次因病請假著賞假一箇月准其暫赴托克托城
就醫一俟稍痊卽著仍赴軍營以資得力其所統各項馬隊著飭

令烏爾圖那遜達爾濟分領防剿不得稍有鬆懈將此由五百里各諭令知之○壬子命吳棠查勘雲南水災籌款撫恤○癸丑諭軍機大臣等總理各國事務衙門奏布倫托海分界事宜請簡員會同俄國勘辦一摺布倫托海所屬地方皆係塔爾巴哈台管轄之地前據明瑤奏稱塔城未經克復道途梗塞無地可分茲據該衙門奏稱俄國使臣擬於塔城安靜地方從北起首先建鄂博並稱無中國大臣會辦亦可自行建立是該處分界事宜亟應迅速辦理文碩係布倫托海辦事大臣實無旁貸著於明歲春融時馳赴該處約齊俄國使臣將瑪呢圖嘎圖勒汗至哈巴爾蘇一帶逐一查勘會立牌博毋得草率了事布倫托海地方情形福濟知之最悉此次文碩前往應如何揀派嚮導及指授機宜之處著該將軍悉心籌度並著商同文碩錫綸卽日行文俄國分界官約期辦

理原摺單均著鈔給閱看將此由六百里各諭令知之○派總理各國事務衙門大臣戶部尙書董恂辦理美利堅國換約事宜○甲寅諭內閣前因劉嶽昭奏參四川總督吳棠荒謬貪污物議沸騰各款當經諭令李鴻章馳往四川確查具奏茲據李鴻章查明覆奏吳棠家眷抵川親丁僕從僅五十餘人並無用夫三千餘名四轎一百餘頂及需索門包之事該督到任時司道及各屬員等均未致送規禮亦無飭造木桶裝銀情事補署各缺均按班次由兩司會詳毫無情弊其裁減胡中和湘勇令張祖雲另募川勇係爲節省餉需起見川省應解劉嶽昭劉嶽曙餉銀陸續籌撥並未停解至另解岑毓英餉銀本係應協滇餉並非移此就彼岑毓英亦無差官餽遺之事並訪聞川省官場習氣頗尙鑽營吳棠履任後遇事整頓以致貪官猾吏造言騰謗等語吳棠被參各款既據

李鴻章查明均無其事卽著毋庸置議川省吏治防務均關緊要吳棠務當振刷精神力籌整頓毋稍瞻顧貽誤劉嶽昭於所參吳棠各節並未詳查虛實輒以傳聞無據之詞率行入奏實屬不合著傳旨嚴行申飭該督見已馳抵雲南省城著將應辦各事與岑毓英和衷商榷不得稍涉偏私致干咎戾○諭前因御史張沅奏四川道員鍾峻彭汝琮貪詐鑽營又據御史龔承鈞奏彭汝琮任意招搖各節先後諭令李鴻章查明參辦茲據奏稱鍾峻被參各款查無行賄實據惟該員妄改場規包攬釐局已有明徵彭汝琮貪利各情雖不承招而鑽營實有其事且丁憂後奉旨飭令回籍仍敢逗畱營求爲崇實吳棠公請幕友請分別參辦等語四川成縣龍茂道鍾峻著卽勒令休致永不敘用鹽運使銜四川候補道彭汝琮著卽行革職勒令回籍不准投效各路軍營再圖開復崇

竇吳棠於奉旨飭令回籍之員仍復畱充幕友均有不合著交部照例分別議處尋吏部議崇實吳棠均照上司濫邀屬員充當幕友進署辦事革職私罪例議以革職得旨均著加恩改爲革職畱任○諭軍機大臣等劉嶽昭岑毓英奏官軍攻克楚雄等城劉嶽昭奏移師進省會籌全局各一摺滇軍連克楚雄南安定遠三城已有破竹之勢惟土堆祿豐之賊負隅未下該二處賊黨無多著劉嶽昭岑毓英督飭各軍乘此聲威迅圖攻拔其省南之昆陽新興館驛漣兮及東南之澂江竹園等處踞匪並著分飭官軍力圖進取次第廓清以便騰出兵力直擣迤西老巢綏靖邊圉劉嶽昭見在旣抵省城卽著與岑毓英會籌調度該督撫均膺重寄務當和衷商榷共維大局不得稍存私見致負委任昭魯一帶漢回構釁見在曾否解釋並著妥爲籌辦毋致滋生事端將此由五百里

各諭令知之○追于湖北殉難知縣王恩綬於江夏建祠○乙卯諭軍機大臣等富明阿奏派兵堵剿竄匪一摺據稱吉林甯古塔屬薩奇庫卡倫額穆赫索羅通溝及省西北下二台等處有賊匪竄擾業經分派官兵捕剿並於各要隘一體堵擊卽著富明阿毓福嚴飭派出將弁督率官兵認真按捕務將額穆赫索羅通溝等處賊匪悉數殲除不准一名漏網將此各諭令知之○賞通州王恕圍賑米六百石○丁巳諭內閣軍機大臣吏部尙書文祥病逾月月尙未就痊實深厯繫著派御醫王繼武前往診視並賞給人蔘八兩以資調理○諭軍機大臣等金順奏官軍會剿疊勝踴毀賊壘一摺納家牯踞逆見渠湃上修築礮臺糾眾直撲工所王家疃莊亦出賊來襲經金順等會派楊春祥各軍擊敗追至納家牯濠邊王逆三常福等亦將王家疃莊之賊擊退逆首納萬沅王三

春句合陝回於楊和堡修築壘卡楊春祥等分投壓剿斃賊甚多該處新築四壘均經官軍踴毀其分擾渠西及衛隊營地東各賊復經何維愷等追殺直抵納家牖東門見賊眾均集於納王兩莊金順等擬進紮楊和堡一帶以圖進取著卽會同張曜督飭各隊將渠泮礮臺趕緊築成一面抽撥東面各營乘勝合圍以收聚殲之效毋任該逆負嵎拒守阻截官軍前據左宗棠奏甯靈已無陝回蹤迹茲金順奏西岸南路陝匪屬集納王兩莊甯夏一帶陝回情形究竟若何劉松山軍見抵何處相距計不甚遠何以未見會合靈州是否失守著金順查明詳細奏聞並將甯靈等處甘回向背情形據實具奏將此由六百里諭令知之○予甘肅陣亡參將何維愷祭葬世職○戊午諭軍機大臣等定安奏搜剿蒙境竄匪殆盡擬請添調隊伍並調總兵張得祿統帶各摺片宋慶一軍進

勦鹽海子等處回匪疊獲勝仗挫斬殆盡勦辦尙屬得手所有在
事出力員弁著由定安擇尤彙案保奏候旨施恩仍著該將軍督
飭宋慶等各帶所部認真探勦並令沿河各軍嚴加防範毋稍疏
虞見在張曜等進軍甯夏其邊外後路雖已布置嚴密而河西一
帶尙屬空虛定安請調勁旅以厚兵力自應俯如所請著神機營
王大臣派撥兩翼前鋒八旗護軍營頭二起馬隊一千名並派得
力大員統帶前赴綏城其劉景芳舊部馬勇五百名卽著崇厚檄
令該提督統帶赴綏以資熟手一俟到防統由定安酌量分撥以
爲張曜後路接應至此項兵勇應需餉乾卽著神機營崇厚按月
籌款給發毋令缺乏其前經到防之天津洋槍礮隊餉需仍著崇
厚照舊發給定安奏前後調到之吉林黑龍江馬隊餉乾請
機營一併統籌接濟之處著該王大臣斟酌辦理

給閱看張得祿遠在奉天飭調需時應派劉景芳管帶馬勇以免
周折將此諭知神機營並由五百里諭知定安崇厚知之○己未
飭浙江等省歲撥清淮協餉銀各二萬兩修堰圩隄工○庚申諭
軍機大臣等福濟等奏密陳管見暨請飭錫綸催令圖瓦強阿趕
回署篆並請區別巴哈等城餉銀各摺片布倫托海遊民業經反
正若不妥爲安插必致日久流離福濟等以哈密勇目孔才與降
眾多有親故已函商文麟等轉爲勸諭卽著文麟景廉諭知孔才
迅派妥人招集將該降眾帶赴哈密軍營既可遂其報效之忱又
得親朋完聚藉息爭端該大臣等務當善言開導毋令失所錫綸
因游氏新撫欲令圖瓦強阿帶兵鎮守此等降眾毋庸紫隊防閑
致滋疑慮況索倫一營甫回本境管帶乏人著錫綸仍照該將軍
等前議催令圖瓦強阿統帶原來官兵趕回署篆以重邊防不准

藉詞延緩科布多布倫托海兩城本有定餉見在哈密巴里坤軍務未平餉需何可缺乏嗣後各路餉項到烏城時福濟等自應先顧巴哈以資防剿其科海兩城不得藉口借撥著該將軍等卽行分咨各該城大臣遵照辦理福濟文碩原摺一件著畱覽將此由五百里各諭令知之○盛京將軍都興阿奏游匪竄擾孤山見經撲滅得旨著仍嚴飭搜拏逸犯毋任逃脫肅清邊界○壬戌諭軍機大臣等前因劉嶽昭奏唐友耕所部滇練與昭魯回民尋仇生釁當諭崇實等飭令該提督趕緊前進不准逗畱茲據崇實吳棠奏魯甸回匪李本忠糾黨數千燒殺村寨抗拒官軍叛迹昭著旋經唐友耕會同該處文武剿撫兼施解餉後路見已肅清威甯等處回寨均各求撫唐友耕一軍應否畱滇請飭劉嶽昭等商辦等語李本忠原係杜汶秀黨與此次糾眾復叛自難姑容見經官軍

殲斃賊黨千餘名逆膽已寒卽當乘此聲威速籌戡定劉嶽昭所
派孔昭鈐等曾否行抵昭通辦理情形若何刻下雲南省圍已解
唐友耕一軍應否暫留昭通會同辦理或仍令赴省著劉嶽昭岑
毓英妥商調度如滇省兵力已敷卽著咨商崇實等將該軍遣撤
回川扼守邊境崇實等原摺著鈔給劉嶽昭岑毓英閱看將此由
五百里各諭令知之○諭錫綸棍噶扎勒參奏遵保出力弁兵開
單請獎請賞喇嘛銀兩並籌給新撫民人口食整頓臺站及索倫
官兵請賞銀兩縷陳土爾扈特流徙情形暨勘修千佛廟宇請賜
廟名扁額棍噶扎勒參奏因病請假各摺片棍噶扎勒參隨征弁
兵在事出力自應量予獎勵惟此次單內開列各員有無冒濫著
福濟錫綸會同詳細查覈奏明候旨其隨同錫綸辦事弁兵亦著
歸入此案酌保數員毋許浮冒至所請賞銀一千兩分給喇嘛愛

拜等一節並著該將軍等查覈具奏原摺片單三件卽發交福濟查明辦理變民初經撫定錫綸等見已籌買糧石等項陸續解往藉資口食而臺站廢弛轉運維難亟宜設法整頓著奎昌明瑤於所屬各臺站或廣籌錢糧或添設駝馬務令一律整飭不得仍前疲弛致誤大局至該民人等安插事宜仍著文碩錫綸等妥議章程奏明辦理見屆冬令塞外風雪嚴寒所有在防之索倫官兵及綠營兵丁著照所請每人賞銀十兩以示矜恤棍噶扎勒參歷年帶兵勦賊著有勞績此次因病請假自應俯如所請著賞假一箇月調理假滿後卽赴阿爾泰山收集徒眾妥辦安插各事以遂其皈依懺悔之忱其勘修千佛廟宇著俟工竣由福濟文碩錫綸等陳奏再行賜名並頒發扁額至所鑄千佛請用軍臺駝載之處殊於定制不合著不准行土爾扈特人眾北徙屯駐布倫托海地方

業由錫綸等暫給口食以濟目前著福濟等相機妥辦遣回本牧該蒙古向來崇信佛法並傳知棍噶扎勒參協同勸阻毋失機宜將此由六百里各諭令知之○癸亥諭軍機大臣等豐紳謙禧奏甯夏籌防情形靈州失守各摺片甯夏府城解嚴業經金順馳奏見在賊匪聚於納王兩莊著金順懷遵前旨會同張曜迅籌圍剿毋任久踞甯夏城防豐紳謙禧仍當備豫不虞毋稍疏懈靈州失守總未據左宗棠奏報茲豐紳等奏接劉松山咨稱副將謝明華等在靈州經理糧臺該處回民間各寨堡與官兵接仗遂將城門關閉殺戮漢民謝明華等不知下落等語是靈州回民叛亂已無疑義惟劉松山軍糧臺安設靈州城內有無激變該回民有無搶劫糧臺情事並以後情形若何仍著金順詳細查明據實奏聞將此由四百里諭知金順豐紳並傳諭謙禧知之○予甘肅陣亡副

將李洪吉等祭葬世職○甲子諭內閣都興阿等奏拏獲聚眾滋擾賊匪正法請將帶兵各員分別勸懲一摺盛京鳳凰城屬北井子地方突有賊匪聚集多人譌詐鋪戶並將岫巖廳通判截畱意圖占踞孤山糾眾擾害經統領叢登甲等帶兵往捕將賊犯王慶等二十四名拏獲正法至起釁要犯叢均茂叢漳等見尙在逃著都興阿等嚴飭帶兵各員務將該犯等設法訪拏嚴行懲辦此次在事出力員弁兵役准由該將軍等擇尤酌保毋許冒濫防禦倭什楞額驍騎校文保經鳳凰城守尉奕艾派往剿賊竟敢託故遲延實屬疲玩倭什楞額文保均著革職交該城守尉差遣以觀後效奕艾於所派兵丁參差不齊亦難辭咎著交部察議○諭軍機大臣等前因都興阿等奏勘辦展邊事宜當經諭令該部查照向章行知朝鮮國王慎守邊境如有遊民私越滋擾情事卽行照例

懲辦茲據禮部奏據該國王咨稱以近來遊民恣意蔓延罔有顧忌非伊國力能擒捕因畏道路梗塞請使江外之地柵路去處嚴奉諭旨無敢再肆違越等語奉天發江西岸與朝鮮僅一江之隔該處地狹人稠既嚴禁准墾民人不准過江一步如有越界滋事者准由該國查拏解交附近邊門懲辦該遊民等自必知所敬畏不敢肆越滋擾惟內地奸民愈聚愈眾難保不於江外之地仍行偷越該國王慮及道梗欲於柵路去處遵奉嚴禁自係實情著都興阿等懷遵前旨於沿江一帶嚴飭各該地方員弁實力稽查倘有中國民人私行開墾或於沿邊肆擾不法者卽行嚴拏懲辦不得任其屯聚以重邊防將此由五百里各諭令知之○左宗棠奏欽奉諭旨定安等奏降回變亂靈州失守等語著將起衅情形查明具奏等因欽此

臣維劉松山一軍於八月初二日進抵靈州是

夜據靈州知州及該州已撫回目周斌詣營面稟陝回自敗竄靈境後占踞甘回莊宅甘回畏其悍不敢較劉松山以甘回既久經受撫自宜示以區別當面諭周斌密傳甘回安分自保並令自左肩至右脇斜繫草繩傳諭各營毋得濫殺飛札馬化澁傳知各寨堡毋稍驚疑一面出示曉諭並飭周斌選派甘回十餘人陣前傳示所過各回堡俾咸知官軍止剿陝回已撫之甘回安居無恐初三日劉松山田靈州進兵郭家橋沿途各撫回堡寨竟敢施放槍礮傍堡列隊大呼喊殺官軍勇丁受傷者六十餘名劉松山猶恐愚民無知置之不理初四日各寨堡紛紛出隊挑戰劉松山猶恐馬化澁尚未傳到或係甘回驚疑仍按兵不動又出示曉諭免剿初五日甘回各堡寨復列隊近營施放槍礮比官軍出隊仍歸寨內初六日列隊撲犯官軍營壘劉松山始出隊擊之一切情形曾

於摺內詳敘九月二十日接到劉松山報八月初七至十二日五
獲大勝公牘內敘及十二日據靈州逃出勇丁洪得勝稟稱靈州
城內甘回將城門關閉亂殺漢民前派去護餉之副將謝榮華陳
永錫及續派去靈州買糧之提督曹加正副將陳明遂張福星彭
友亮張細祿王榮華及勇丁七名均不知下落臣詳閱來牘於州
城文武曾否遇害未據敘及卽護餉買糧各員弁勇丁亦無確實
下落未便據以入告且據劉松山緘稱馬化澂以官軍迅進下橋
據永甯洞要害之地故喉靈州甘回劫我餉銀截我後路意圖掣
官軍回援可乘勢奪踞下橋要津而專兩渠之險暫宜置之不理
臣比令將靈州曾否失陷文武員弁如何下落知州鍾牧是何名
詳細開報以憑入奏尙未接其覆牘頃又據道員曾傳理緘告得
劉松山十月初六日信九月二十三日攻克劉家寨西北七寨二

十九日克復靈州城池並破城外四寨一壘十月初二日攻克營東十餘里里仁渠一帶大小九寨其公牘由環縣一帶繞遞均尙未到蓋環慶山谷巒互殘破以來千里白骨黃沙人煙闕寂文報難通也此後各軍齊近聲息相接或可附便馳遞臣維馬化澄陰賊險恨天下共知自就撫後築寨修堡購馬造械仍與畎回互相首尾陝回敗則資以馬械陝回窮則助以軍糧從前屢見章奏自甯靈西達西甯南通河狄各回民無不仰其鼻息穆圖善曾令招撫西甯河州諸回迄不之應且常嗾所部掠蒙古藩部定安所訊據活賊白天才之供劉松山自花馬池南下時曾擊敗飽掠回巢韋州蘇光棍之黨事皆在八月以前是時官軍未抵下橋也其變果誰激之言者所稱濫殺激變自是指八月初三日郭家橋初次大捷而言馬化澄八月初四日所上臣稟於劉松山軍抵何處且

一字不題豈果有濫殺激變之事而反爲諱之乎白彥虎禹得彥
楊文治諸逆首之突犯固原州實馬化澂族其黨馬萬春率之以
來豈亦由固原各軍激之而然乎甘肅之民漢回雜處昔本漢多
於回近則回多於漢若甯靈一帶周數百里則漢民幾無遺類固
原州一城回民北徙後漢民存者不過十數靈州一城漢民存者
不過數家其產業婦女均歸金積堡老弱死亡壯丁爲其傭工佃
屋漢民之痛心疾首抑又何怪其然臣接靈州紳民之稟聳惕不
安顧慮失茲不圖張駿元昊之患必見諸異日臣此時扶同徇飾
欺己以負 皇上異日蒙旨詰責死有餘辜至劉松山爲人忠勇
而明方略當時諸將實罕其比卽如此次諸大捷正奇迭用他人
得其一已爲奇功而所陳戰狀語語切實絕少矜張亦可概見臣
與曾國藩議論時有不合至於識拔劉松山於凡眾中信任最專

其謀國之忠非

臣

所及

臣

於劉松山雖有心愛護思爲國家保此

將才然事關大局如劉松山實有濫殺激變之事咎有攸歸

臣再

代爲庇護自蹈欺罔之咎

臣

雖至愚極陋不敢出此此區區微忱

所求諒於

君父而不敢必者也自來辦賊之法剿撫兼施然回

性犬羊知畏威而不知懷德辦理次第與他賊正有不同辦他賊

先剿後撫辦回則必以撫爲先蓋回之所藉爲亂端者漢與回有

異視也非宣布朝廷德意分良匪不分漢回則賊有詞以脅其黨

眾將剿不勝剿然若壹於主撫賊必以撫愚我陰集其黨眾蠶食

漢民又將撫不可撫竊恐漸漬既久勢不至如雲南撫回爲回所

制不止

臣

前疏所言攻心爲上者竊以爲大局雖終歸於撫然非

俟其畏剿之極誠心乞撫則固未可漫然允之見仍飭各軍前進

一切剿撫機宜必俟劉松山察酌實局而後會同穆圖善覈奏斷

不敢草率從事致貽陝甘異日之憂亦不敢鹵莽相將致傷 皇上如天之德又奏劉松山一軍八月初七日起二十八日止節次大捷情形 臣已馳報茲據劉松山報八月二十八日夜擒獲賊探訊據供稱吳忠堡北二里許顧家寨馬家寨踞賊本陝回白彥虎黨夥因屢敗膽寒約今夜四鼓移向寨後而以陝回崔三所部賊黨填踞顧馬兩寨劉松山遣人往探一面傳令步軍整隊以待四鼓前探飛報寨內火光漸出寨外火光亦漸近劉松山以兩寨相距不過數十丈飭各營分兩路向兩寨左右進一向兩寨之中進自率各營旗相機策應並分布左右兩支稍取遠勢以拒各堡援賊兩堡逸賊戒諸軍非近賊不開槍呼殺比抵兩寨前見賊方出入互雜尙不知官軍已到也官軍擂鼓發號提督何作霖朱德開從中路衝入各路槍礮齊施寨內外之賊均震懼失措人號馬嘶

自相蹂藉道員劉錦棠提督蕭章開乘寨門未開揮軍直入顧家寨馬家寨內外各賊殲斃殆盡其顧家寨南小顧家寨內賊亦忙亂五品軍功董福祥馳報劉松山立督各營分兩路鈔給提督易致中乘勢破其外卡堆薪焚寨門提督譚拔萃軍功董福祥越壕而入堡上磚石雨下壯士肉薄而登適寨門焚穿各軍齊入寨內賊約四五百名無得脫者天明收隊畱同知李樹棠一營分駐兩寨其小顧家寨則舉火焚之計是戰破回寨三座斃賊一千二百餘名生擒百四十餘名官軍員弁勇丁陣亡者二十六名哨官受傷者六員弁丁受刀矛礮子傷者五十一名受磚石傷者七十二名此八月二十九日大獲勝仗情形也是日酉刻馬化澂遣人款營齎臣所批就近稟商劉松山公文一件馬化澂並稟劉松山停兵待其勸導陝回懸候覈辦劉松山許之令其呈繳戰馬軍械九

月初三日馬化澂稟已諭令各陝回確具冊結懇定呈繳馬械章程力請移軍吳忠堡界外劉松山飭將馬械悉數呈繳再議初五日馬化澂呈遞陝回陳林禹得彥馬正和崔巍等稟結懇轉稟臣暫緩進剿劉松山仍令將馬械悉數呈繳再議初七日馬化澂稟繳擡槍十桿小槍十五桿瘦馬二十四匹並解米糧一萬七千石稟中於甘回就撫與否一語不及劉松山知其詐嚴批申飭勒限兩日悉繳馬械初九日有遊擊胡如東巡檢李廷光來營同稱陝回又繳擡槍五十桿馬五十四匹存馬化澂處卽解送大營其餘馬械必俟官軍退紮橫城方可呈繳劉松山不准飭胡如東李廷光歸語馬化澂仍刻日呈繳初十一兩日馬化澂並不稟覆而賊馬四竄似覘官軍動靜者兩夜賊中修寨掘壕如恐不及十二日胡如東李廷光復來營申前請劉松山不應詢胡如東則穆圖善所

委催糧者李廷光則曾被馬正和所脅者劉松山知爲馬化澂央託而來飭仍語馬化澂將求撫真僞情形據實稟覆然固知求撫之非誠也十三日劉松山親帶馬步隊伍赴余家湖察看賊據縱營夫四出割草試賊動靜午後金積堡馬賊蠶擁而來吳忠堡亦相繼出隊似誤以營夫爲官軍意圖鈔截劉松山飭營夫回營官軍列隊急調老營出隊策應騎賊欺官軍隊伍頗單結隊數十團冒死衝突步賊傍敬家莊兩堡排列劉松山令各隊猛撲之斃賊多名賊退兩堡旁開槍死拒正鏖戰間適老營隊伍馳至劉松山立飭蕭章開湯彥和李雲貴劉錦棠尹興茂譚拔萃喻執益等率所部從堡右鈔出並防西南來援之賊飭朱德開李就山李樹棠等向堡北進飭董福祥兩營分附左右馬隊之後繼進賊見大隊齊至立即驚潰蕭章開劉錦棠畱營分兩路防援賊各率所部奮

威衝殺斃賊甚多有步賊二三百敗由原路回堡劉松山麾軍截擊盡殲之乘勢縱火焚燒堡門各營將士紛由堡之四面猱騰而上連克兩堡堡中之賊無一漏網計是戰共斃陝甘各回八九百名生擒一百三十八名內有賊目馬阿忻馬光發一併正法官軍陣亡員弁勇丁十九名受傷九十七名此九月十三日大獲勝仗情形也賊之連夜築寨掘壕也意圖引秦渠之水灌官軍營壘兼爲守堡計十四日五鼓賊於吳忠堡南決開秦渠偪水東流辰初吳忠堡東南一帶平陸成川賊仍併力加攻修壩劉松山飭何作霖譚拔萃周國勝由左路直攻壩西賊壘飭席大成易致中相機策應飭蕭章開湯彥和李雲貴劉錦棠尹興茂譚汝萃喻執益董福祥張俊由右路分兩支進飭朱德開李就山李樹棠相機策應飭潘運璋陳宗藩彭緒圻譚上連率馬隊四營由右路之右進防

吳忠堡以北援賊並飭各營如賊不過水漫溝則勿深進也迨各營進偏賊壘半里逆賊竟憑壘抗拒官軍奮力進攻忽西北騎賊約一二千飛奔來援衝過水漫溝蕭章開劉錦棠若無所見仍攻壘如故火器環施雷轟電掣賊不能支棄壘鼠竄官軍乘勢將水漫溝壩頭決開大溜西趨蕭章開劉錦棠急督馬步各營擊之賊向溝西潰走被水衝斷殿後騎賊二三百名折而北趨又爲馬隊截阻悉偏溺急溜中無得免者蕭章開劉錦棠見溝東一寨水淹堡腳汲溜甚急乘勢撲之寨中之賊恟懼無措遂揮所部掘堡剝劈寨門立將溝東賊寨攻破是戰破壘決壩共殺賊六百有奇生擒七十四名並予斬決官軍陣亡員弁勇丁十一名受傷者五十六名此九月十四日大獲勝仗情形也十六日午後水勢漸消各堡之賊仍加掘長壕是夜劉松山傳令各營攜鋤鍤草束三鼓

出隊向水漫溝取齊馬步五路後仍布疊陣銜枚而進距溝半里賊始驚覺憑壕開槍絡繹奔赴是時月明如晝官軍五路齊撲賊不能支一面擲草掀土平壕疊進賊向西路劉家寨王家寨陳家寨縮退劉松山令馬軍列隊勿前飭步軍踰溝猛躡之賊因官軍追急未及入寨紛紛撲壕官軍乘勢掩殺戮斃溺斃者頃刻屍積壕塹將士卽藉賊屍躍過其蕭章開劉錦棠所部兩支已鈔過賊後賊無路可逃有退入堡中者有縋牆而上者官軍迅卽奪門而入同時將三寨攻破寨內外賊斬殺淨盡劉松山隨飭董福祥張俊畱所部分守之急督所部進攻王家莊梁家莊兩堡又克之天明收隊計是役連破堅寨五座斃賊實一千五百餘名除陳家寨回目陳添玉王家寨回目馬合義於兵到時逸出其餘三寨頭目馬大舉馬奮剛哈得招均經陣斬生擒逆回一百一十餘名陣前

正法各營員弁勇丁陣亡二十二名受傷者一百四十三名此九月十六夜蕩平賊壕賊寨大勝情形也劉松山軍糧均自河西採購由葉昇堡轉般至營自賊決秦渠河水倒漾余家湖運道須繞由西北行走而王家高樓張家灘各回灘適當其衝十八夜劉松山飭各營裹糧聽令並多攜鋤鎬四鼓出隊向王家高樓比相距半里許賊已驚覺宵柝乍停礮聲頓起各營齊隊撲之堡中礮石如雨而人聲喧雜異常劉錦棠乘勢猛攻一面填壕猱騰而上賊開北門逃竄馬步各營分投掩殺逸出者無幾劉松山卽令李就山帶所部前旗入據該寨仍親督馬步各營向張家灘北進行八里天色已明見張家灘兩寨並峙寨西三里許爲朱家寨遂令分支進攻察看寨東寨西野潦縱橫不便布陣乃飭各營以次魚貫而行比近堡前礮石飛注如雨壯士躍壕以火器仰攻或積薪焚

門或揮鋤掘堡前者帶傷後者繼進賊漸不支是時朱家寨回堡見劉錦棠蕭章開大隊猛進卽啟西門向余家寨而遁劉錦棠蕭章開乘勢掩殺徑抵于家寨寨中踞賊亦相率西竄劉錦棠蕭章開急揮馬隊左右鈔截步隊從中路緊追賊無可逃盡由湖水溝鳧水而過水深湍急三寨之賊得登彼岸者不過百數十人而已惟張家灘兩寨賊眾因官軍圍攻甚緊無路可逃拚死堅守至已初乃破堡而入堡內之賊無一漏網劉松山以此五寨爲北路糧運所必經飭馬隊分守俟所調安定後路四營至再以步隊更替填紮步隊收回老營計是戰破六寨一壘殺斃淹斃回逆計一千七百餘名生擒二百一十三名其張家寨回目馬得貴則於堡破時訊明生擒斬決餘賊一併正法官軍陣亡員弁勇丁十六名受傷者八十六名此九月十九日攻破寨壘大勝情形也十七日有

久陷金積堡之山西湖北各省漢民來營具保馬化澂永無反覆
劉松山閱其稟詞於甘回呈繳馬械及陝回投誠事並無一語敘
及引詰其故據稱伊等從前在金積堡貿易被陷茲馬化澂扣其
眷屬偏令來營具保委非所願詢以馬化澂是否甘心投誠甘回
是否俯首帖服則僉云不能知也劉松山嚴飭之十九日復破王
家高樓張家灘一帶六寨一壘老賊膽寒益可想見以理勢論之
陝回既去金積堡賊勢已孤又經官軍連次痛剿其迫而求撫固
在意中惟馬化澂狃於從前未受懲創仍肆狡謀其求撫也僅以
陝回爲詞自居勸導之名一若未嘗同預逆謀者所呈繳之馬械
又係派各甘回擇其疲朽不堪者呈繳希圖狡賴如果代陝回求
撫豈有代匿馬械陰縱其逃之理如果甘心悔罪豈有陰藏馬械
固爲後圖之理姑勿論指噉陝甘各回力抗官軍罪狀昭著也見

在賊勢衰微而官軍四集劉松山已調花馬池定邊畱駐之四營
前往合隊其金運昌所統卓勝軍馬步均已行抵花馬池是甘肅
北路局勢穩固堪慰 聖懷又奏陝回西竄疊經官軍截剿九月
十八日以前戰狀業經馳報陝安道黃鼎於打拉城克獲大捷詎
知向西南敗竄之賊所賸不過二千餘人馬械糧食拋棄大半不
復成隊由百草園郭城驛一帶竄走圖與前竄之禹得彥等合股
黃鼎本擬派隊窮追旋探剿敗之賊馬正和陳林等股尙在新堡
子收集散賊仍擬乘勝剿之二十一日五鼓督隊東出天明抵王
家井溝見騎賊數百往來馳騁似窺探追軍者見官軍旗幟微露
羣隊狂奔黃鼎令步隊居中馬隊張左右翼前進賊伏南北兩山
中見官軍整隊猛進自量不支向東敗走各營躡至新堡子山徑
開豁地平如掌馬正和陳林等列隊抗拒官軍奮威衝殺立斃悍

賊數十名賊卽奔潰追殺十餘里斃賊百餘名步隊搜斬兩山及新堡子街內外之賊約數百名拔出被裹漢回千餘名訊據難民供稱十八日之敗顏阿洪九社營老野阿洪擺萬馬生彥馬正和各股死傷大半惟陳林馬長順在後縮退倖免打拉城之敗藍九阿洪亦經官軍陣斬陳林馬正和等敗蹙之餘仍圖折回金積堡是時陝西提督雷正綰聞信率所部由半箇城向長流水地方截之二十三日行至何家口遇騎賊數百擊敗之遙見長流水一帶炊煙大起知賊屯踞此間二十四日整隊前進適賊正挈眷紛逃雷正綰率隊衝殺斃悍賊二三百名賊向四百戶地方竄去二十五日提督周蘭亭率所部馳至會隊追剿沿途搜斬甚眾追至黃河邊上橋地方探報甘回李應春率賊千餘自西路橫截而東勢出官軍之後雷正綰周蘭亭卽掣隊分途截剿行過北口與賊遇

兩軍夾擊斃賊約數百名又追至石家溝斬賊百餘二十六日仍整隊追剿行五十里抵馬家河陳林馬正和等知追軍將至先將輜重眷屬送往金積堡自率悍賊二三千殿後雷正綰周蘭亭結方陣擊之賊紛紛潰走官軍馬步緊追二十餘里瞭見賊之輜重家小在前逆賊復回戈返鬪官軍奮威衝殺斃賊數百名薄暮收隊馬家河灣自半箇城迤北一片沙漠水草均乏官軍糧盡引還西竄崔禹等逆臣原調提督徐占彪步隊三營提督楊世俊馬隊四營由靜甯州出會甯安定之間相機截剿九月十七日徐占彪接會甯縣官紳稟報前次剿敗土匪張貴侯得應等逃至會甯又囑聚匪黨攻掠會甯北川攻破岳家等堡寨六處請兵速剿十九日徐占彪馳抵會甯二十日黎明出賊不意兩路擊之斃匪百餘名張貴率匪黨伏地乞撫徐占彪押令回靜甯點驗分別遣散二

十三日楊世俊馳抵會甯訶知陝回經官軍擊敗後由會甯之城郭驛紅堡子等處紛紛西竄楊世俊於二十四日五鼓由乾溝驛繞出牛馬墩遇賊騎千餘護眷竄走楊世俊督馬隊兩旗掩擊追至馬家堡斬馘甚眾二十六日躡追至嶠口斬殿後悍賊八十餘名生擒九名賊之老幼婦女墮崖死者無數急催徐占彪步隊赴嶠口會合以便縱擊二十九日楊世俊率馬隊抵車道嶺探知賊將眷屬輜重移紮漫窪站灘一帶而悍賊則紮甘草店大營川以拒追軍初一日徐占彪率所部步隊至嶠口卽於是夜五鼓合隊齊由車道嶺出甘草店賊列隊死拒官軍官軍整隊衝殺賊仍敗走追至大營川收隊初三日黎明楊世俊徐占彪率馬步仍分三路追至高崖先後逃竄之賊均已麤聚於此徐占彪飭步軍結成方陣楊世俊飭馬隊張左右翼擊之斃悍賊百餘步軍滾隊緊逼

馬隊左右斜鈔賊勢不支紛由水家坡新營兩路敗走漫窪官軍
蹙之陣斬三百餘名及抵站灘地勢狹隘羣賊擁擠不前憑卡死
鬪楊世俊令所部下馬開槍刀矛手從卡旁搶上徐占彪由兩山
覓徑鈔出立斃悍賊五六百名壓追至距狄道州四十餘里之漫
窪十八盤始收隊而回計連日截勦殺斃悍回千餘拔出漢回難
民數百名初四日黃鼎率所部各營馳至則賊已由狄道向河州
竄去黃鼎以臣前檄先顧蘭州再進勦河州之賊見在中路南
路赴省驛道疏通蘭垣局勢自固稟以楊世俊馬隊四營紮安定以
兩營紮紅土窰徐占彪步隊兩營輔之以通蘭垣之氣擬以步隊
七營紮會甯張會元崇志馬隊紮靜甯西數十里地方就水草黃
鼎暫赴靜甯點驗張貴降眾分別辦理事定聽調臣擬令其事定
後先赴蘭垣附近擇要安營俟北路局勢略定再相機調遣規復

河州以見在局勢論之陝回被勦悉數西趨惟九月十八日打拉城大捷後陳林馬正和等敗殘餘逆復折而東竄又經黃鼎蹕追雷正綰迎勦所贖能戰之賊不過二千餘老幼婦女則漫山徧野不知其數十月初四日遞稟赴道員曾傳理處據稱已由馬化澂轉稟劉松山先繳馬械一半乞降詞甚哀切臣接馬化澂初六日稟亦同惟詭稱不知是否誠實臣察其情形則窮蹙乞撫本無可疑馬化澂故意顛倒以飾其前此之詐耳曾傳理當飭聽劉松山批示而雷正綰周蘭亭兩軍已於初六日由四百戶進擬駐黃渠橋邊徧之簡敬臨張福齊亦於初六日進駐韋州堡與劉松山會商辦理其甘回頭馬化澂之黨馬萬春馬中海李應春等均紛赴曾傳理處求撫良回李百寬丁化鵬穆進善等則爲官軍代購糧料遞送文書惟恐弗及臣飭曾傳理一律安撫以昭分別至陝

回自鹽茶廳逃竄經官軍衝散後老弱婦女號啼四散凍餒難堪見經曾傳理飭各員回認保收養已不下萬數千口俟事定乃能分地安插 上諭陝回經官軍擊敗後竄踞顧家寨等處劉松山督軍進剿馬化澂屢以求撫爲辭而賊中修寨掘壕並未少息該軍自八月二十九日至九月十九日疊破顧家寨馬家寨各處賊壘並斬賊目毛遂生等多名見在陝回已去金積堡賊勢甚孤惟馬化澂陰蓄詭謀每以乞撫爲緩師之計若不痛加剿擊爲患更深劉松山所調花定後路四營計已早到著卽飭令該提督乘此聲威合隊追剿毋任該逆從中勾結日肆蔓延如有真心悔罪赴營求撫者亦著該提督相機辦理黃鼎雷正綰等軍在新堡子等處各獲勝仗殺賊甚多賊由狄道向河州竄去見在赴省驛道已通著該大臣卽飭黃鼎等分投扼紮遏賊回竄之路其蘭垣防剿

事宜並著妥籌兼顧。同人李百寬等該大臣仍當檄令曾傳理分別妥爲安撫。靈州降回變亂見在收復。查非劉松山濫殺所致。著毋庸議。副將謝榮華等下落並著查明辦理。刻下黃河冰結。山西河防更爲緊要。該大臣旣以李慶翱爲不足恃。則郭寶昌赴晉之行尤不可緩。著卽檄飭該提督酌帶親兵迅赴山西。金運昌已督軍抵甯條梁。並著飭令迅速前進。與劉松山軍會埽賊氛。毋稍濡滯。將此由六百里諭令知之。○乙丑諭軍機大臣等。金順奏官軍進攻賊巢見已合圍。一摺。甯夏解嚴後逆匪踞納王兩莊伏匿不出。惟於寨外添築卡壘。負隅抗拒。經金順會同張曜督兵進攻。獲勝。毀平賊卡三座。分隊追趕。直抵寨門。該逆猶敢憑牆死守。並出馬隊鈔襲我軍。復經該署將軍等痛加剿擊。會兵合圍。勦辦尙屬得手。著該署將軍會同張曜激勵各軍。乘此聲威。務將賊剋期攻

拔母稍遲延其杜家寨等處屯聚陝土各匪甚眾亟應剿除以孤
賊勢並著督飭將弁分路進剿毋任勾結爲患將此由五百里諭
令知之○諭劉峴奏援黔官軍擊苗疊勝克復勝秉城池一摺貴
州苗逆九大白等在勝秉城屯聚提督龔繼昌督隊進攻賊復死
拒總兵蘇元春分路鈔擊燒毀城外之巫信貴籠涼風坳各逆坵
當將勝秉城池收復龔繼昌又擊敗施洞口等處來援之賊其平
苗三寨經蘇元章躡平包大肚等合股來追官軍將其擊退清水
河邊山上賊坵亦經龔繼昌攻破焚燒賊穀甚多彭芝亮等復將
潛襲施秉縣城及分伏木弄等處各逆先後截殺各路賊卡均已
次第掃除剿辦尙屬得手惟施黃境內苗巢猶多必先平施黃逆
巢肅清江內方可分路攻取制賊紛竄見在席寶田已抵長沙卽
著劉峴飭令該臬司趕緊部署督軍前行以期迅抵黔疆與川軍

會合痛掃逆氛其清江寨頭鎮施各路應行增兵填紮之處亦著該臬司妥籌布置毋稍疏漏另片奏請調總兵赴黔差遣等語總兵蕭榮芳既據該撫奏稱打仗尙能得力卽著飭令募勇二千名前赴貴州攻勦歸席寶田調遣以資厚集將此由五百里諭令知之○署甯夏將軍金順奏九月二十九日提督劉松山督軍克復靈州城池報聞○閻敬銘乞休以童華爲工部右侍郎彭九餘爲左副都御史由大理寺卿遷○以湖南官軍克復貴州勝秉城予提督龔繼昌等優敘復總兵官唐本朋蘇元春職並賞還勇號花翎○予甘肅陣亡副都統貴陞祭葬世職建祠入祀昭忠祠並副將范珍等祭葬世職○丙寅命曾國藩查直隸被旱災區分別賑濟○丁卯諭軍機大臣等穆圖善奏官軍擊勦竄匪獲勝並畱總兵接辦軍務請飭糧臺撥餉接濟各摺片甘肅禮縣所屬地方於本年八

月間被回匪滋擾經提督喻正祥親督兵勇節節進剿殺賊多名該匪潰敗狂奔見在崖城等處已無賊蹤卽著左宗棠穆圖善飭令各軍仍行加意防範遇賊卽擊毋稍鬆懈其駐紮中衛之貴字三營著照該將軍所請飭令總兵黃金山接統將前募防城之勇補足三營額數並另集團隊二百名悉聽金順節制卽著該署將軍妥爲調遣會同張曜聯絡劉松山暨金運昌各軍將北路回逆悉數埽蕩貴字營等餉需無處支領著左宗棠飭令西征糧臺將黃金山所統三營並圍隊二百名需用餉銀按月撥濟穆圖善著懷遵前旨將總督關防迅速派員齎交左宗棠接受以專責成將此由四百里各諭令知之○予甘肅陣亡副將蔣光晉知縣翟步霄等祭葬世職